

## Txiau Txiau Ryberiti

<sup>1</sup> Jiarỹ Txiau rare. Deuxu Jesuisi Kristu Inynyrỹ-wana deòdu rare. Ròritidỹreri Deuxu mahãdu inatyhy-ò. Ubỹtỹmy iny rỹira mahãdu-ò. Warybe weityhyna adeereny rewahinyreri.

<sup>2</sup> Waityhydỹdu aõna aõnasira seriòre, araurihixinanykeki adeereny kanamyhỹkeki, beysamahãbenyke.

<sup>3</sup> Kia-di tahe ityhydỹdu tyhymy beleke. <sup>4</sup> Aurihixina ixinamy rexiòlònyke atyhykemy. Ixinamy kanake araurihikemy. Tai tahe raòbitidỹnykre adee aõ rasiranyòtyhy.

<sup>5</sup> Inyò bedeery ihoòkeki, rexitòenykre Deuxu dee, tii dori ibutu dee riwahinymyhỹre. Inyò lau dori ritòenyòhymyhỹre. <sup>6</sup> Urile tii iseòdỹòmy bexityhynymy tamy bexitòenykre. Riseònykeki yhy òbò-di tiò rehumyhỹre wese rare. <sup>7-8</sup> Kia hãbu iòreki, awimy aõkõ aõhebo rotỹnymyhỹre ywiòreki, tii Deuxu-ribi aõ ritaòtyhy, irybe inatxire.

<sup>9</sup> Iny aõ ijòkõmy rỹimyhỹre, teysamy rỹirake, aõ ijòdikreki Kristu dori rityhynyre. Kia iaòdimy ityhymy rỹira, tule teysamy rỹike ityhydỹdumy. Rỹiraki aõ ijòòkre hãre. <sup>10</sup> Ityhyna heka iny-ribi wylemy ituemyhỹre kie iwese noijese ramoròmyhỹre wese. Tahe ityhydỹdu mahãdu dee kia aõ aõkõ rare. <sup>11</sup> Txutòteetyhy ròhònymyhỹre dori alòbòròna rimoròdỹnymyhỹre. Tahe noijese rejuxunymyhỹre. Tahe iruxerana riixãwidinymyhỹre. Kia wesele hãbu ityhymy rỹire rexihumyhỹre. Aõhebo rotỹnymyhỹre wetyatxile.

12 Urihixina inyõdee kanakeu, tahe ijesu binaõ wesemy ritakeki. Tai tahe tii reysakre. Tii tahe umytuedeõna heka Deuxu-ribi ritakre. Deuxu dori kia wahidỹỹnamy rarybere taluunadu mahãdu dee. 13 Inyõ aõbina bina ixirana-di rexirakeki. Tii rarybeõtyhyke Deuxu riixiranymyhỹremy. Inyõ dori Deuxu tiu riurihiõtyhy. Tule Deuxu riixiranyõtyhy aõbina bina widỹỹ-di. Ixiradỹỹdu aõkõ tii rare. 14 Kiawese iny ixiribile rexirake, aõ-di sõwemy rõhõtinykeki, tii arabõnyre, araitxenanyre. 15 Kia urari-ribi tahe òraruna rònõnymyhỹre. Iribi tahe òraruwidỹỹna-ribi rubu rỹimyhỹre. 16 Ixitxenadỹỹõmy waluuna mahãdu, waseriõre mahãdu. 17 Wahidỹỹna ibutumy be-deerydỹỹnatyhy Deuxu biu-ribi diwahinyde kia ibutumy loosõnatyby-ribi naderi. Tiu heka rawitxiraõtyhy, tii aõu aõu iweselere. 18 Tii iny ixityre riwinymyhỹre ritỹmyranymyhỹre tatyhyna rybe-di. Tai ibutumy iwidỹỹna-ribi inyboho juhuurenyre, awirenyre.

19-20 Idi mohõtinybenyke waluu waseriõre mahãdu. Ibutumy bexiywinymahãbenyke iny-ò boholamyhỹbenyke, tahe aõwimy aõkõ marybeke lau, wymy adebureõmy. Hãbu debure-ribi Deuxu òbitina rahenyõtyhy. 21 Abinamy aõhebo tutỹỹnymyhỹte ixi-ribi bitake idi biatyke. Tahe Deuxu rybe-ò boholake, kia dori iruruna dire atyytyby kanatakemy. 22 Kaiboho bedewina widỹỹdumy, bedewina tyhydỹỹdumy boibeke. Aõ ijohonadu mahãdulemy aõkõ boibeke. Kiawesekeki bexiitxenanyke. 23-24 Inyõ ijohonadule ronykeki, rybemynamy nodu aõkõ

rare. Tii hãbu itxerena-di itxerenadu wese rare. Itxerena-di ixidee retehereu, rexieryre iwese raremy. Tahe rexitareu, aõwesele ixi-ribi tõhõti rosare timybo tii rare wahe. <sup>25</sup> Inyõ tahe bede ywina òbiti-ò retehemyhỹreki, rityhynymyhỹreki tii tahe teysamy ratxikremy ibutumy aõhebo rotỹnykremy. Tii dori ijohonamy nohõti losadu aõkõ rare. Bede ywina rybe widỹỹdu rare, ityhydỹỹna wahe. <sup>26</sup> Inyõ bede ywina rybe widỹỹduõmy rõhõtinkyeki, tahe tõrõtò riyrubunyõhyymyhỹkeki, tabedeywidỹỹna aõ aõkõ rare. Tii tawokile rexiitxenanyhỹre. <sup>27</sup> Iny Deuxu, Inytyby-ò kia bede ywina widỹỹna òbiti rare. Uladuwyte, wytese-wana riwiðhenanykemy. Tule aõbina bina aõmydỹỹnana widỹỹõmy.

## 2

<sup>1</sup> Waseriðre mahãdu, kaiboho Inynyrỹ Jesuisi Kristu, tetyhynytenyete loosõna wedu tii rare. Tai iny wiribi lahitxiõmy, wiweseweselemy iny-di atximahãbenyke. <sup>2</sup> Kie inyõ tahe dohodỹỹnawo-ò kanalòkeki, womati debo tỹrỹrỹ-di tywihikỹ-di kanalòkeki, tahe tule iny aõkõdu mahãduõ kanalòkeki. <sup>3</sup> Kai tywihikỹ dinodu-ò marybekeki: Kaò bodonyke rynawihikỹ-ò. Tahe marybekeki iaõkõ-ò: Kiakile myike lamalemy ada bede-txi aõbo bonyke. <sup>4</sup> Kia wese wiribi hitxidỹỹ-ki tatỹỹnymyhỹtenyete, araykyreny rabinamy kia wese tumahãre. <sup>5</sup> Boholake, waseriðreboho, kaiboho juhoo iny aõkõ mahãdu wese toite. Iribi ityhy ityhydỹỹdukõdu mahãdu iaõrarumy roirekemy, kaiboho Deuxu weselemy tadeletenyete atyhyna òraru-ki. Aratamyhỹreny

inatyhyna-di ityhydumy boibekemy, tule  
 kaiboho kowa biu-ò hena bitabenykre.  
 Deuxu dori rarybere: –Waluudu mahādu tuu  
 arisỹnykre. <sup>6</sup> Kiawese, kaiboho urimynodu  
 derarenyre aõhebo tatỹnyteri. Ityhy mahādu  
 tahe ararutỹkỹnymyhỹre tule aradyrenymyhỹre  
 soldadu dohodỹna heto-ò. <sup>7</sup> Tiiboho tule  
 Kristunimy aõbinamy rarybemyhỹrenyre.  
 Kaiboho ini-di texininimyhỹtenyete. <sup>8</sup> Kia bede  
 ywina rybe-ki roire: iwese ixiluure wese,  
 aerykõdu mahādu luuke, wiery mahādu wahe,  
 abireludu wahe. Kia bede ywina biywinykeki,  
 awimy botỹnyimy mabeke. <sup>9</sup> Tahe iny wiribi  
 lahixinykeki, taõrarunyeri, teywinyõteri. Bede  
 ywina aõkõ atximahāte. <sup>10</sup> Inyõ tahe bede ywina  
 rybe ibutumy riywinykeki, tahe sohoji aõmydỹna  
 riywinyõreki, tai tahe bede ywina rybe ywidỹdu  
 aõkõ ratxireri. <sup>11</sup> Deuxu tarybe ririre. Kia  
 rarybera: –Òta òta widỹõmy. Tule rarybera:  
 –Rubudỹõmy. Tai òta òta biwinyõkeki tahe inyõ  
 terubunyteki, kai bede ywina rybe yrubudỹdu  
 aõkõ atxiteri. Òrarudumy tate. <sup>12</sup> Iwese iny  
 bede ywina rybe-di tỹmyra ahābenyke. Deuxu  
 dori bede ywina-di arararutxỹnyrenykre. Taita  
 òbitimy botỹnybenyke, marybebenyke. <sup>13</sup> Inyõ  
 riwotõenyõmyhỹkeki, tule tamy riwotõenyõleke  
 tawiribihixinatxu-u. Wotõedỹna wiribihixina  
 ratyre rare.

<sup>14</sup> Waseriõre mahādu, inyõ rarybekeki: –Jiarỹ  
 watyhyna ijõdire. Tahe iaõmydỹna wihikỹ-di  
 aõkõ rare. Kia tahe aõ aõkõhyky heka rare tamy.  
 Ityhynale kahābu ritakekõ aõbo. Tahe reruinyreri.

15-16 Inyseriòreõ tyy, rÿsÿna ihoõke-wana. Tahe inyõ tamy rarybekeki, ywina-di bõhònyke, aheto-ki biroxikemy. Tahe aõ riwahinyõra tyy, rÿsÿna-wana. Aõbohe irybe rare. Aõkõhykyre irybe. <sup>17</sup> Kiawese taheka kia hãbu inatyhyna rare, iaõywidÿÿna ihoõkeki kia ityhyna ihoõke wese rare. <sup>18</sup> Inyõ rarybeke-wana: –Kai atyhyna dire. Jiarÿ waõwidÿÿna ijõdire. Biteõsinyke wadee atyhyna sohojile tamyreny wina-di aõkõ. Tahe jiarÿ tamyreny waywina-di adee ariteõsinykre kia õraru-ki bobike jiarÿ Kristumy retyhynrerimy. Watyhyna iny idiõre waõwidÿÿna ijõõre-wana. <sup>19</sup> Kai bityhynyke Deuxu sohojile raremy. Kia tahe awire urile diabo tyytybybina tule Deuxu rityhynyre. Tai ilau ruberumyhÿre. <sup>20</sup> Inatyhyna iaõmy widÿÿnana ihoõkeki, aõ aõkõ wese rare. Kia tetyhynyõlemahãte aõbo, hãbu itxÿtere. <sup>21</sup> Inylabiereny Abraõ tariõre-di Ijai rixiwenykemy idi ratximyhÿu, kia-ki Deuxu riõbitinyre. <sup>22</sup> Tabimahãte aõbo. Abraõ tatyhyna iwidÿÿna-wana aõna aõna riwinyre. Ityhyna riwiõhenanyre. <sup>23</sup> Tahe iwese ritidÿÿnamy roire wesemy tuu rotÿÿnyre aõmybo heka rarybera Abraõmy: –Boholake, Abraõ heka Deuxu rityhynyre. Tai Deuxu tii riõbitidÿÿnanyre. Tule, Deuxu tabiõwamy rininire. <sup>24</sup> Betehebeny ini. Inyõ iõbitidÿÿmy ronyke-wana inatyhyna sohojidile aõkõ tii ihÿke, tahe iwidÿÿna-di tule wahe. <sup>25</sup> Ijõre tahe: Raabe, aderanamy raremyhÿ. Iribi tii Deuxu rybedeõdu mahãdu riyrubunyra rubu lau, tahe riteõnyre rywasi wixira-di. Kia widÿÿna Deuxu Raabe riõbitidÿÿnyre. <sup>26</sup> Iwese

umy tyytyby-di aõkõ rubumy rÿimyhÿre wese, tule inatyhyna sohojile aõ aõkõ rare tamywina-di aõkõreki heka rubu wese rare.

### 3

<sup>1</sup> Uritere, waseriòreboho, bedeerydÿÿdu mahådumy aõkõ ix-di norenykõomyke. Ibede õnana hitxina txuu dorihe aõnihikÿkre bede erydÿÿdu mahãdu dee. <sup>2</sup> Inyboho ibutumy sõwemy òraruna-txi aõu aõu resemehÿrenyre. Inyõ tarybe-ki raòrarunyõkeki, tii iny òbiti rare. <sup>3</sup> Iwese awaru iny riraòmyhÿre wese taumy ibutumy riraòmyhÿre. Awaruru-ki juraròsõna rirutymyhÿreu, tii iraròsõna-di rare. Tai tahe awaru iny riywinymyhÿre iumy ibutumy iny riraòmyhÿre. <sup>4</sup> Betehebenyke iny heòty lawò nihikÿ-ò iraròsõna iyjatyhyre tahe iraròsòdÿÿdu idile riraòmyhÿre titxibo inonana-ò yhy nihikÿ iwetxi kedeakreki, ihãrele iraròsõna riraòmyhÿre. <sup>5-6</sup> Iwesele iny dòròtò rare. Iyjatyhyre ihãrele aõnihikÿmy rarybemyhÿre. Betehebenyke iny heòty helÿÿresi iyjare, ihãrele òtiranihikÿ ritoonymyhÿre. Dòròtò tahe heòty wese rare. Sõwemy heka òraru riwinymyhÿre. Dòròtò bede aõmydÿÿnanabina dinodu wese rare, inyumy susudÿÿdu dòròtò rare. Sõna bede tòtee-ribi diabo mahãdu-ribi heka nade. <sup>7</sup> Ibutumy iròdu brebuna, nawii witxira witxira, iròdu beraludu, utura, riinytyhydÿÿnymyhÿre. Iny mahãdu iratyre irurudÿÿna dire. <sup>8</sup> Inydòròtò inyõ tahe riinytyhydÿÿnyõtyhy. Ibinatyhy rare. Rubudÿÿna uri-di ratxireri. <sup>9</sup> Inydòròtò-di Deuxu inytybymy iny realàmehÿre tule idi inumy

raujõmomyhÿre. Deuxu ixiwesemy iny riwinyre, ihãrele iny wimy raujõmomyhÿre. <sup>10</sup> Inyõ tary-di Deuxu rirowòwydynymahãre tule idi ujõmomy reamyhÿre. Waseriõreboho, kiamy aõkõ idi boibeke. <sup>11</sup> Beijirana-ribi ibree ihÿre-wana wiule heka ròhònyõtyhy. <sup>12</sup> Òwòru inatxi wiribi lahixire. Ijõ aõbo wiraty-di raratynyke aõkõre? (Figueira azetonamy raratynyõtyhy) Videira figomy raratynyõtyhy. Juwyrabe hãloo-ribi bebreke ròhònyõtyhy.

<sup>13</sup> Inyõ bederykeki ibedeerynadikeki, tii ywimy ratximyhÿke. Ibutumy òbitimy ratxirerimy aõ riwinymyhÿremy rexityhynomy ixidi ròhõtynyõtyhy tyhymy rabekemy. <sup>14</sup> Kaiboho awo-ki ixiburena ijõdikeki, inywixira hãrosu ijõdikeki tai tii deysamy atxiõke tai tuu marybeõke. Kai ruiwidÿÿõmy. <sup>15</sup> Kia bedeeryna biu-ribi aõkõ nade, bederibile, iny hãrosu diaboribile nade. <sup>16</sup> Inywixira hãrosu ijõdike-wana, tai jei jeina rare. Ibutumy aõbina bina. <sup>17</sup> Bedeerydÿÿna biu ludu juhule òbiti rare, idi ywina rare, rutaõna rare, wityhyna rare, ruxetõena rare. Awihyymy nodu widÿÿna rare. <sup>18</sup> Òbitina aõu aõu kanakre ywinawidÿÿdu-ò. Iwese aloborodu rehumyhÿre wese, tiiboho ywinamy rekoamyhÿrenyre.

## 4

<sup>1</sup> Aõherekibo ayreny-ki jei jei rÿimyhÿre. Awo-ribi namyhÿde araykywydyna ribi. <sup>2</sup> Kai sõwemy aõdikemy tahõtynymahãte aõhebo aõkõ tetate. Tahe terubunymahãte. Inywixira aõmydÿÿna-di òbire, tahe aõkõre. Tai aõbina tetelenymyhÿte

ijei jei-di. Aõ ijõõre textitòenyõma hãteki.  
<sup>3</sup> Textitòenyteki, tetaõmahãtenyete. Teòsamy dori  
 textitòenymahãtenyete. Ixidee sohoji dehunalemy  
 tahõtina mahãtenyete aumydeewimy behukelemy.  
<sup>4</sup> Bede aõmydỹnana luudu mahãdu heka Deuxu  
 òludumy ihỹre. Kia aõbo teeryõtenyete, òbitiõna,  
 mahãdu. Inyõ bede aõmydỹnana bina biòwamy  
 ratxikeki, Deuxu òludumy rare. <sup>5</sup> Aõ aõkõ  
 aõbohe rybe riti kawese roire: Aõhe rare.  
 Deuxu taTyytybytyhy inywo-ki heka Deuxu  
 risỹdỹnnyhỹre. Tai tahe iny-di riijetyhymy  
 ratximyhỹre. Aõbo heka kia rare? <sup>6</sup> Tii tahe  
 iny rirurteredỹnnyhỹre. Kawesemy ritina  
 rarybere: –Ixiwedu mahãdu heka Deuxu  
 ixi-ribi riredỹnnyhỹre. Tahe ruxetòena  
 sõwemy ixiwedekõ mahãdu-ò riwahinnyhỹre.  
<sup>7</sup> Deuxudeewi biwinymahãke. Diabo ixi-ribi  
 biredỹnnykeki, tahe tii aribi rahenyke.  
<sup>8</sup> Deuxu-ò bexiòhòdỹnnykeki. Deuxu adee  
 rexiòhòdỹnnykre. Òrarudu mahãdu, ebòmy  
 bexilyraranyke aòraru-ribi bexitake, rybe  
 inatxi mahãdu, araykyworeny biòbitinybenyke.  
<sup>9</sup> Mabedewoke, bobuke, mahinyke aòraruna  
 òraru-ki. Ajuedena-ribi arube rytynykre,  
 eysa-ribi mabedewomy atxikemy. <sup>10</sup> Ayrubumy  
 Inynyrỹko-txi boibekeki, tii aratamadỹnnykre; tii  
 ixideewimy riwinykemy.

<sup>11</sup> Waseriòreboho, uritere aõmy wimy  
 ryberenyõmy. Inyõ taityhydỹduseriòremy tuu  
 ibinamy rarybekeki, iaõna aõna riaõkõkeki tii  
 bede ywina ibinamy rarybereri. Bede ywina  
 rybe riaõkõdỹnyreri. Inyõ bede ywina rybe



riaõkõnykeki, tii bede ywina ywidỹỹdu aõkõ rare. Tii bede ywina rybe hitxidỹỹdu rare. <sup>12</sup> Deuxu sohojile dori bede ywina hitxidỹỹdure. Bede ywina dohodỹỹna dinodu tii rare. Tii itarasadỹỹdu rare ihãre irubudỹỹdule rare. Mobohe kai atxiteri; abireludu hitxidỹỹmy aõbo texinohõtĩdỹỹnyteri? Aõkõre.

<sup>13</sup> Boholabenyke, tuu tarybetenyteri: wijile aõbo ada biurasõmy aõbo rokoirenykre hãwãõ-ò. Tai bededỹỹnana sohojimy rikierenykre. Tai nieru tarasamy rakaõmysỹdỹỹrenykre. <sup>14</sup> Txiõhe rare. Kaiboho dori teeryõlemahãtenyete aõhebo bede rotỹỹnykre. Timybo mabekre? Iwese biuwetyy yja aõwesele rexihymyhỹre wese heka timybo mabekre? Kiawesemy aõkõ marybeke. <sup>15</sup> Kamy heka marybeke: –Inynyrỹdeewikeki iny rummy rokoireke, tai tahe kia ada kowa aõbo rikiwinyrenyke. <sup>16</sup> Iwese wiji ratximyhỹre wese. Biurasou aõnihikỹ widỹỹmy marybekeki, kia tahe awi aõkõ rare. <sup>17</sup> Inyõ aõwiwidỹỹ rierykeki, tahe riwinyõmyhỹ-wana kia rexiòrarunanyyhỹre.

## 5

<sup>1</sup> Boholabenyke warybe-ò ityhy mahãdu. Mahinybenyke, bobubenyke aõhõkỹmy botỹỹnybenykreki. <sup>2</sup> Aõmydỹỹnana wiwihikỹ rabinamy rỹire. Atyywityhy isibrey tysini riròre. <sup>3</sup> Aorotỹrỹrỹreny awomatiurareny raruxinyra tabededỹỹnana riõnonyrerimy. Anieru susudỹỹna awobiredỹỹnamy kiditỹnynykre. Iwese dee heõty risõmyhỹre wese, kia sudỹỹ anasõmyhỹkre. Aõna aõna sõwemy ixidee tebutunymahãte kia atxukonana-ò. <sup>4</sup> Abaderòwysydỹỹdu òwydỹỹdu

aõkõ dori kai tate. Kai ixideele tebutunymahâte iribireny tawasinymahâte. Tiiboho rahinymy rirajuamyhÿreny tahe kia wysydÿÿdu mahãdu hina-ò Deuxu roholare. Tii ruru mahãdu wedu rare. <sup>5</sup> Kaiboho abeòrareny teònonytenyteri isikile. Ixideehÿyle texideysadÿÿnymyhÿte. Ibutumy aõbo adeereny wiwi ixidee temytenynte, iwese rubutxudÿÿnatxu broreni riòwenymyhÿre wese. Kai ahâte. Deuxu akanarubunykre. <sup>6</sup> Òbiti mahãdu teteònymahâte terubunymahâte. Tii tiu adee rexiòwynyòtyhy.

<sup>7</sup> Ixieleeledÿÿòmy tahe waseriòreboho. Inynyrÿ kanakreu. Betehe inihe. Òworudu heka taaõwi riraòmyhÿre biu bedeu. <sup>8</sup> Kia wese kaiboho tule elelemy aõkõ biraòmyhÿke aworeny-ki beximymyhÿbenyke, Inynyrÿ nonana dori iòhòrehe. <sup>9</sup> Waseriòreboho uritere wimy ibinamy ryberenyòmy Deuxu dori arahitxinyreny. Ihitxidÿÿdu nonana tahe iòhòre ijòkiwesele riijemy rÿimyhÿre. <sup>10-11</sup> Waseriòreboho ihetxiu Deuxu rybemy rybedu mahãdu iyrubumy rÿiramyhÿ. Iwese tiiboho rÿiramyhÿwese boibeke aõhòkÿmy dÿÿnana-ki rare. Kia aõhò kÿmydÿÿnana-ki òbitimy rotÿÿnymyhÿre. Iwese Jòò iyrubumy raremyhÿre taholamahãtenynte. Tule iwese ionanau Deuxu riwiòhenanyre wesemy teerytenynte. Inynyrÿ dori ruxetòenatyhy-di rare làhànatyhy-di.

<sup>12</sup> Ibutu ratyre waseriòreboho inatyhymy soho-jilemy marybeke ijò rybemy rybeòmyke Deuxu arybe ritxiònyòtyhy. Aõna aõnamydÿÿnanaribike aõkõ iximyhÿyle marybeke. Kohemy marybekeu kohelemy marybeke. Aõkõmy

marybekeu, aõkõlemy marybeke. Kawese-ki inyõ aratxiõnyõkre.

<sup>13</sup> Inyõ aõbo ayreny-ki aõhõkỹmy rotỹnyreri. Tahe tai bexitõenykre. Inyõ aõbo ayreny-ki teysamy ratxireri. Àlànawi-di tii wana mawiunykre. <sup>14</sup> Inyõ aõbo ayreny-ki webinadumy roireri wana. Tahe dohodỹna rybedu mahãdu-ò tamy bididybedenyke tamy rexitõenyrenykeny. Adỹ ityre ritxiwikemy Inynyrỹni òraru-ki. <sup>15</sup> Ixitõedỹna tyhynale webinadu riteytenykre. Inynyrỹle ritamahỹnykre. Tii òraru-ò raòrarunymyhỹke-wana Deuxu iòraru riixãwidinyke. <sup>16</sup> Iny wiò wiòmy aõna aõnarenymy belyybenyke. Wiò wiòmy wii biixitõedỹnybenyke, ibutu-ribi beytebenykeny. Inyòbiti ixitõedỹna irurudire, aõna aõna sõwemy riwinymyhỹke. <sup>17</sup> Eliasi heka inywesereny rare. Tii rexitõenyhyymyhỹre biu ròãtyhykremy bede-ò. Tahe inataõ beòra-di biu ròãhyyre. <sup>18</sup> Tahe ixityre rexitõenyre. Tai biu ròare. Tahe oworu-ki ixityre aõwi ruhunyre.

<sup>19-20</sup> Waseriòreboho, inyõ ay-ki inatyhyna-ribi ròhònykeki. Inywitzira tuu rarybekeki, teòsary-ribi ridykeki, tahe ityytyby ritara, rubu konana ixãwina lau sõwemy araru-di riixãwidinyre. Kie.

## **Deuxu Rybe Tyyriti** **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Karajá

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 21 Feb 2024 from source files  
dated 29 Jan 2022

55ce0bcd-101e-52a3-984e-847027efe150